

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 498925 25 St
Tuzla, 23.07.2026. godine

Općinski sud u Tuzli, stečajni sudija Vedran Milašinović, u postupku predhodnog ispitivanja prijedloga za otvaranje stečajnog postupka nad dužnikom „ASNIDIJA“ d.o.o. za proizvodnju i promet roba i usluga, export-import Živinice, ul. Živiničke ose br. 2, sa podružnicom „ASNIDIJA“ d.o.o. za proizvodnju i promet roba i usluga, export-import Živinice, PJ br. 1, ul. Živiničke ose br. 2, dana 23.07.2026. godine donio je slijedeće,

RJEŠENJE

POKREĆE SE PRETHODNI POSTUPAK radi utvrđivanja uslova za otvaranje stečajnog postupka nad imovinom privrednog društva „ASNIDIJA“ d.o.o. za proizvodnju i promet roba i usluga, export-import Živinice, ul. Živiničke ose br. 2, sa podružnicom „ASNIDIJA“ d.o.o. za proizvodnju i promet roba i usluga, export-import Živinice, PJ br. 1, ul. Živiničke ose br. 2.

Za privremenog stečajnog upravnika imenuje Eldar Močić iz Gradačca, Čelikovača 44.

Privremeni stečajni upravnik dužan je odmah po prijemu rješenja o imenovanju preduzeti radnje utvrđene odredbom člana 63. Zakona o stečaju, a naročito:

- obezbijediti imovinu dužnika i starati se o istoj,
- ima ovlaštenja da uđe u poslovne prostorije dužnik i provede neophodne radnje,
- utvrditi da li postoji razlog za otvaranje stečajnog postupka,
- ispitati da li će imovina stečajnog dužnika pokriti troškove stečajnog postupka,
- utvrditi da li se poslovanje stečajnog dužnika može u cjelini ili djelimično nastaviti u toku prethodnog postupka i
- uraditi kontrolu poslovanja stečajnog dužnika.
- kada je podnosilac prijedloga za otvaranje stečajnog postupka stečajni dužnik, dostaviti izjašnjenje da li je stečajni dužnik, odnosno organ ovlašten za zastupanje stečajnog dužnika podnio prijedlog za otvaranje stečajnog postupka u roku od 60 dana od dana nastupanja platežne nesposobnosti.

Privremeni stečajni upravnik dužan je podnijeti svoj pismeni izvještaj ovom sudu u roku od 30 dana od dana donošenja ovog rješenja u kome će izvijestiti ovaj sud o preduzetim radnjama i iznijeti svoje stručno mišljenje o tome da li postoje razlozi za otvaranje stečajnog postupka, odnosno da li postoje bilo kakvi izgledi za nastavak daljeg poslovanja dužnika.

Mjere pojedinačnog prinudnog izvršenja pokrenute protiv stečajnog dužnika se obustavljaju, izlučna i razlučna prava povjerioci ne mogu ostvariti u predhodnom postupku, stečajni dužnik ne može raspolagati budućom stečajnom masom bez saglasnosti privremenog stečajnog upravnika i suda, a sve to u cilju osiguranja buduće stečajne mase.

Rješenje će biti objavljeno u „Službenim novinama F BiH“, web stranici Općinskog suda u Tuzli i na Internet stranici FIA-e, te se pozivaju povjerioci da privremenom stečajnom upravniku bez odlaganja dostave prijedlog mjera osiguranja na predmetima stečajnog dužnika koje će eventualno zahtijevati.

Ovo rješenje će se dostaviti Odjeljenju registra ovog Suda, Zemljišno-knjižnom uredu Općinskog suda u Živinicama i Službi za geodetske i imovinsko-pravne poslove Grad Živinice, radi upisa zabilježbe otvaranja prethodnog postupka.

Obrazloženje

„ASNIDIJA“ d.o.o. za proizvodnju i promet roba i usluga, export-import Živinice, ul. Živiničke ose br. 2, sa podružnicom „ASNIDIJA“ d.o.o. za proizvodnju i promet roba i usluga, export-import Živinice, PJ br. 1, ul. Živiničke ose br. 2, podnio je dana 18.12.2025. godine ovom sudu prijedlog za otvaranje stečajnog postupka nad ovim privrednim društvom, zbog platežne nesposobnosti stečajnog dužnika.

Stečajni sudija nakon što je utvrdio da je prijedlog za pokretanje stečajnog postupka podnesen od strane ovlaštenog predlagača u smislu odredbe člana 58. stav 1. i 2. Zakona o stečaju („Sl. novine F BiH“, br.53/2021. u daljem tekstu Zakon o stečaju) i da je isti dopušten, dana 12.05.2026. godine, naložio je predlagaču da uplati novčana sredstva na ime predujma finansiranja troškova prethodnog postupka radi utvrđivanja uslova otvaranja stečajnog postupka.

Predlagač „ASNIDIJA“ d.o.o. za proizvodnju i promet roba i usluga, export-import Živinice, ul. Živiničke ose br. 2, sa podružnicom „ASNIDIJA“ d.o.o. za proizvodnju i promet roba i usluga, export-import Živinice, PJ br. 1, ul. Živiničke ose br. 2, je dana 23.06.2026. godine dostavio sudu dokaz o uplati predujmljenih sredstava za finansiranje prethodnog postupka u iznosu od 5.000,00 KM.

Na osnovu priložene dokumentacije i to: potvrda NLB banke od 24.12.2025. godine, potvrda NLB banke od 26.02.2026. godine, Aktuelni izvod iz sudskog registra od 27.02.2026. godine, nalog za plaćanje poreznih obaveza od 07.01.2026. godine, presuda zbog propuštanja Okružnog suda u Banja Luci od 17.02.2026. godine, tužba Actros doo Prnjavor od 16.12.2025. godine, tužba NLB banke od 24.12.2025. godine, nalog za prinudnu naplatu UIO BiH od 20.01.2026. godine, nalog za prinudnu naplatu UIO BiH od 25.12.2025. godine, prekršajni nalog PU F BiH od 08.01.2026. godine, odluka o prestanku rada društva od 12.12.2025. godine, bilans stanja na dan 31.12.2024. godine, bilans uspjeha za period 01.01.-31.12.2024. godine i uplate predujma od 5.000,00 KM, predlagač je učinio vjerovatnim platežnu nesposobnost.

Na ročištu za saslušanje stečajnog dužnika održanog dana 12.05.2026. godine, zastupnik je izjavio da se društvo bavilo međunarodnim transportom. Bili su u poslovnom odnosu sa Finster Valder sa sjedištem u Njemačkoj/Holandiji, međutim oni su taj poslovni odnos prekinuli a to im je bio pretežan izvor prihoda tako da kasnije nisu mogli ostvarivati prihode i plaćati obaveze. Imali su i kratkoročni kredit prema NLB banci i nisu bili u mogućnosti da ga otplate oko 60.000,00 KM. Društvo ima obaveze i prema PU i UIO ali ne u velikim iznosima a pored toga ima prema Shel doo Tuzla oko 25.000,00 Eur, Nutria doo Živinice, Asim Komerc doo Gradačac, Actros doo Prnjavor, Tesel Prom doo Živinice. Društvo prema radnicima ima dugovanja za otprilike jednu i po platu (8 radnika) a doprinosi su za radnike izmireni sa krajem novembra 2025. godine. Račun društva je blokiran u 10 mjesecu 2025. godine mislim. Društvo od imovine ima vozilo Golf 5 na kojem ne postoje zabrane otuđenja. Vozilo je u voznom stanju, istekla je registracija, a nalazi se na adresi firme ul. Živiničke ose. Društvo nema nekretnina u vlasništvu niti drugih pokretnih stvari. Društvo ima potraživanja u ukupnom iznosu cca 15-20.000.00 KM prema više lica od kojih su neki u BiH a neki u inostranstvu i prema saznanjima te firme su zatvorene zbog čega i nisu mogli naplatiti niti su pokretali sudske postupke.

Iz svega navedenog proizilazi da društvo nije u mogućnosti izvršavati svoje dospjele obaveze od momenta dospijeca u neprekidnom trajanju dužem od 60 dana od dana nastanka obaveze. Konačno

stanje u pogledu eventualno drugih obaveza bi se moglo utvrditi u slučaju određivanja privremenog stečajnog upravnika koji bi sudu dostavio izvještaj o poslovnom stanju kod predlagača sa izjašnjenjem o uslovima za otvaranje stečaja.

Na osnovu podnesene dokumentacije i zakonskog zastupnika stečajnog dužnika, sud nije u mogućnosti da sam procijeni postojanje svih neophodnih uslova koje Zakon predviđa za otvaranje stečajnog postupka, te se donosi rješenje o pokretanju prethodnog postupka radi utvrđivanja uslova za otvaranje stečajnog postupka nad dužnikom, temeljem odredbe člana 61. stav 1. Zakona o stečaju.

Odluka iz stava 3. ovog rješenja donesena je temeljem odredbe člana 63. Zakona o stečaju, a nakon što je utvrđeno da privremeni stečajni upravnik ispunjava uslove za imenovanje utvrđene odredbom člana 71. Zakona o stečaju.

Na osnovu navedenog, temeljem citiranih odredbi zakona, sud je odlučio kao u izreci rješenja.

Stečajni sudija
Vedran Milašinović

POUKA O PRAVNOM LIJEKU: Protiv ovog rješenja dozvoljena je žalba u roku od 8 (osam) dana, računajući od dana objavljivanja. Žalbu mogu uložiti stečajni dužnik i privremeni stečajni upravnik. Žalba se podnosi Kantonalnom sudu putem ovog Suda.